

## Weckherlin, Georg Rodolf: Eine Eclog oder Hürten gedicht (1641)

1 Der Schäfer Filodor hat schon durch seine tugent/  
2 Durch seine lieb vnd trew/ die ehr vnd lehr der  
3 jugent/  
4 Der Lieblichkeit gestirn/ der holdseeligkeit blum/  
5 Der Zucht vnd Keuschheit form/ vnd aller Schön-  
6 heit Ruhm/  
7 Der Insul Albion wohn vnd Cron so bewöget/  
8 Daß andre Schäfer dienst vnd lieb sie beygelöget:  
9 Vnd wie Er/  
10 So sagte Sie nun jhm/  
11 Als Er mit Corydon/ den Cloris hielt gefangen  
12 In jhrer haaren strick/ zu jhnen kam gegangen.  
13 Daher/ als Myrta nu vnd Filodor mit lust  
14 Empfundnen gleiche hitz vnd lieb in jhrer brust/  
15 (wie Cloris anders thails wolt/ stoltz vnd hart/ eh  
16 sterben/  
17 Dan daß Er Corydon solt jhre huld erwerben)  
18 Sprach Myrta/ Filodor/ gantz glicklich ist dein  
19 gang/  
20 Dieweil (wie Ich verhoff) du vns nu ein gesang  
21 Mit Corydon/ der auch wol singen kan/ wilt lehren.  
22 Er/ der nichts dan was Sie begehret/ kan begehren/  
23 Beredet Corydon/ der von dem angesicht/  
24 Darinnen seine sehl/ sich kan abwenden nicht/  
25 Sich zu den Nymfelein mit jhm alßbald zusötzen/  
26 Vnd (wan es möglich wer) Sie vnd sich zuergötzen.  
27 Da alßdan Filodor auß grosser lieb vnd fraid/  
28 Da alßdan Corydon auß grosser lieb vnd layd/  
29 Durch ein schier gleiches lied/ doch mit vngleichem  
30 willen/  
31 Fieng an auff dise weiß der Myrt bit zu erfüllen: